

HUTBA – KLONI SE ONOG ŠTO TE SE NE TIČE

Hvala Uzvišenom Gospodaru, donosim salavat i selam Njegovom poslaniku Muhamedu, s.a.v.s.

Draga braćo!

Današnju hutbu naslovili smo „Kloni se onog što te se ne tiče.“

O ovoj temi govorimo povodom prekosutrašnjih izbora u našoj domovini. Možda ovaj naslov izgleda kontradiktoran, jer nas itekako treba da se tiču izbori u našoj domovini. U tom smislu, Islamska zajednica je dala sve od sebe da se što veći broj naših ljudi registrira i ostvari pravo na glasanje. Nažalost, broj registriranih je, iako nešto veći u odnosu na ranije izbore, zabrinjavajuće mali.

Ono što je, zapravo, glavni razlog da govorimo o zadanoj temi je pokušaj nekih ljudi da mali broj prijavljenih pripisuju nedovoljnoj brizi Islamske zajednice.

Umjesto da do određenog roka (6.09.) provjere jesu li na biračkom spisku za glasanje poštom, oni to čine sada kada više nije moguće ništa uraditi. Tako je naša iskrena briga za naš narod i državu pretvorena u još jedan napad na našu Zajednicu. Neki to rade nesvjesno, a neki sasvim sračunato.

Dodamoli tome i napade da Islamska zajednica forsira neke stranke i pojedince, kao i retoriku velikog broja kandidata za razne funkcije na izborima, naslovljena tema nam se čini još aktuelnijom.

U Kur`anu stoji:

„Mi smo stvorili čovjeka i znamo šta sve njegova duša došaptava, i Mi smo mu bliži od vratne žile kucavice.

Gdje se susreću ona dvojica (meleki pisari) – s desna i lijeva – koji prate.

Ne može ni jednu riječ izgovoriti, a da uz njega nije, spreman onaj što ga prati.“

(El-Qaf, 16-18)

Zanimljivo je ovdje navesti riječi znamenitog sakupljača hadisa Ebu Davuda: „Zabilježio sam 500 000 hadisa od Božijeg poslanika, a.s., i od njih sam odabrao 4 800, koliko sadrži moja zbirka, a sasvim su dovoljna četiri hadisa:

1. **„Djela se vrjednuju po namjerama.“**
2. **„Lijepo obilježje vjernikova islama jeste da se kloni onoga što ga se ne tiče.“**
3. **„Vjera ti je potpuna tek onda kad bratu želiš isto što i sebi.“**
4. **„Halal je jasan i haram je jasan, a između njih su sumnjive stvari, pa ih se klonite.“**

Čuveni Hasan El-Basri je rekao:

„U znak da je uzvišeni Bog napustio i na cjedilu ostavio svog roba spada i to što mu je dao da se bavi onim što ga se ne tiče.“

Navedimo u ovom kontekstu i riječi Abdullaha ibni Abbasa, koji je svoje znanje crpio sa nasigurnijeg izvora:

„Petoro mi je draže i važnije od stada najboljih kamila i najplemenitijih konja, pa to i tebi preporučujem:

1. Ne govori ono što te se ne tiče, jer je to prazno i ne garantira ti da si pošteđen grijeha.
2. Ne govori o onome što te se ne tiče dok ne sazrije vrijeme za to , jer neko može, ko govori o onome što ga se ne tiče, reći to na pogrešnom mjestu, pa da mu to opet bude teret.
3. Ne nadmeći se u govoru ni sa razumnim ni sa nerazumnim, jer će te razumni nadgovoriti i osramotiti, a nerazumni će te uvrijediti.
4. Svog brata, kad je odsutan, spominji po čemu bi volio da i on tebe spominje i oprostí ono što bi volio da i tebi bude oprošteno i odnosi se prema njemu kako bi volio da se on odnosi prema tebi.
5. Radi kao onaj čovjek koji zna da će za dobro biti nagrađen, a za zlo kažnjen.“

Ovu hutbu završavamo dovom Uzvišenom Gospodaru da nam osnaži vjeru, da se o onome za šta smo odgovorni brinemo na pravilan način, a klonimo onoga što nas se ne tiče i na šta ne možemo utjecati.

Dragi Bože, čuvaj nam našu dragu Domovinu!

Amin!

Eslöv, 5.10.2018.

Glavni imam IZBUŠ Idriz-ef. Karaman